

Skupština Kantona Sarajevo
Admela Hodžić, samostalna zastupnica u Skupštini Kantona Sarajevo
Sarajevo, 29.10.2025. godine
Bosna i Hercegovina
Federacija Bosne i Hercegovine Kanton Sarajevo
Skupština Kantona Sarajevo N/r predsjedavajućeg
Vlada Kantona Sarajevo N/r premijera
Ministarstvu zdravstva Kantona Sarajevo

ZASTUPNIČKA INICIJATIVA

Na osnovu čl. 106. i 213. Poslovnika Skupštine Kantona Sarajevo („Službene novine Kantona Sarajevo“, broj: 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22-Ispravka i 47/24) pokrećem inicijativu prema Ministarstvu zdravstva Kantona Sarajevo da se pacijentima kojima ljekari dijagnosticiraju opstruktivnu apneju, odnosno hroničnu opstrukcija pluća, troškovi liječenja, kontrole i nabavka aparata za kontinuirani pozitivni tlak u dišnim putevima (CPAP – Continuous positive airway pressure) uvrste na esencijalnu listu, odnosno da troškove takvog liječenja i nabavku aparata snosi ili refundira Zavod zdravstvenog osiguranja Kantona Sarajevo.

OBRAZLOŽENJE

Opstruktivna apneja obuhvata epizode djelimičnog ili potpunog zatvaranja gornjih disajnih puteva za vrijeme spavanja, što dovodi do prestanka disanja >10 sekundi. Simptomi su nemiran san, hrkanje, često buđenje, jutarnja glavobolja i pretjerana pospanost danju. Dijagnoza počiva na anamnezi, fizikalnom pregledu i polisomnografiji. Liječi se nazalnim CPAP–om (continuous positive airway pressure = kontinuirani pozitivni tlak u dišnim putovima), oralnim pomagalima, te, u najtežim slučajevima, hirurški. Prognoza za liječene osobe je dobra, ali većina slučajeva se ne dijagnosticira i ne liječi, što vodi do hipertenzije, zatajivanja srca, te do povrede ili smrti prilikom upravljanja motornim vozilom ili u sličnim nesrećama koje su posljedica hipersomnolencije.

Prema podacima Svjetske zdravstvene organizacije, oko 100 miliona ljudi širom svijeta pati od poremećaja opstruktivne apneje u spavanju, dok više od polovine oboljelih nema postavljenu dijagnozu. Procenat oboljelih od opstruktivne apneje u snu (OSA) u razvijenim zemljama je 2 do 4%; ovo se stanje obično ne prepozna pa često i ne liječi čak i kad su simptomi izraženi.

Apneja u spavanju predstavlja ozbiljan zdravstveni problem i za građane Bosne i Hercegovine. U Kantonu Sarajevo imamo otvoren Centar za poremećaj u spavanju na Neurološkoj klinici KCUS i prema podacima koji su tamo zabilježeni od 300 pregleda, čak 80% pregledanih pacijenata ima pozitivan nalaz na poremećaj Sleep apnea.

Ukoliko se ne liječi, ovo oboljenje može povećati rizik od visokog pritiska, srčanog napada, moždanog udara, pretjerane gojaznosti i dijabetesa. Takođe, može povećati i rizik od nepravilnog rada srca, pogoršati srčanu insuficijenciju, kao i uticati na povećanje rizika od nezgoda na poslu ili pri vožnji.

Nabavka CPAP aparata košta oko 3.500 KM što je prilično visoka cijena, uzimajući u obzir da se takav aparat mora godišnje servisirati i mijenjati svakih 3 do 5 godina. Ovakvi pacijenti često imaju i druga teška oboljenja koja u svemu otežavaju njihov život i često spadaju u kategoriju osoba sa invaliditetom. Zbog toga je neophodno obezbjediti sredstva za liječenje ovakvih pacijenata i nabavku pomagala neophodnih za njihov normalan život, te ove aparate uvrstiti u esencijalnu listu Zavoda zdravstvenog osiguranja Kantona Sarajevo.

Molim nadležne da što prije razmotre ovu inicijativu.

Admela Hodžić

Samostalna zastupnica u Skupštini Kantona Sarajevo